

四庫全書

子部

欽定四庫全書

冊府元龜卷一百二十四 宋 王欽若等 撰

帝王部

講武 修武備

講武

夫武者所以威四夷而遏亂略者也古者戎馬車徒素具因蒐狩以習之昏於農隙以講武焉故周禮有振旅發舍治兵大閱之制教坐作進退疾徐䟽數之節是知

雖有文德必有武備傳曰三時務農一時講武故征則有威守則有財夫子曰教民七年可以即戎矣又曰以不教民戰是謂棄之蓋慮墮軍實而輕人命也乃知士不素習以其將與敵非虛語也漢儀立秋之日始揚威武魏晉而下歷代因之司馬法曰國雖大好戰必亡天下雖平忘戰必危斯國之大事其可忽諸

周武王講武類禡作桓之詩桓志武也

宣王時能內修政事外攘夷狄復文武之境土修車馬

備器械復會諸侯於東都因田獵而選車徒焉

東都王城也

詩人賦車攻以美之

後漢靈帝中平五年十月甲子帝自稱無上將軍耀兵

於平樂

平樂觀在雒陽城西

是時天下滋亂望氣者以為京師當

有大兵兩宮流血大將軍司馬許涼假司馬伍巖說何

進曰太公六韜有天子將兵士可以威厭四方進以為

然入言之於帝於是乃詔進大發四方兵講武於平樂

觀下起大壇上建十二重五采華蓋高十丈壇東北為

小壇復建九重華蓋高九丈列步兵騎士數萬人結營為陳天子親出臨軍駐大華蓋下進駐小華蓋下禮畢帝躬擐甲介馬稱無上將軍行陣三匝而還

魏太祖建安二十一年既為魏王有司奏古四時講武皆於農隙漢承秦制三時不講唯十月都試車馬幸長安水南門會五營士為八陳進退名曰乘之今兵戈未偃士民素習自今以後無四時講武但以立秋擇吉日大朝車騎號曰治兵上合禮名下承漢制奏可是冬治兵

魏王親執金鼓以令進退

文帝初嗣魏王延康元年六月辛亥立秋閱兵於東郊  
公卿相儀王御華蓋親令金鼓之節

明帝太和元年三月丙寅治兵於東郊

晉武帝泰始元年十一月丁酉臨宣武觀大閱諸軍甲  
辰乃罷

十年十一月庚午臨宣武觀大閱諸軍

咸寧元年十一月癸亥大閱於宣武觀至於巳巳

三年十一月丙戌臨宣武觀大閱至於壬辰

太康四年十二月庚午大閱於宣武觀

六年十二月甲午大閱於宣武觀旬日而罷自泰始以來帝皆自臨宣武觀大閱衆軍然不自令進退也自惠帝以後禮遂廢

元帝太興四年詔左右衛及諸營教習依大習例作鴈羽仗

成帝咸和元年十一月壬子大閱於南郊詔內外諸軍

戲兵於南郊之場故其地因名鬪場自後藩鎮相庾諸方伯往往閱習然朝廷無事焉

後魏道武登國六年七月壬午講武於牛川八年七月庚寅臨幸新壇講武

天興二年七月辛酉大閱於鹿苑饗賜各有差

五年六月治兵於東郊將西討姚興

六年五月大簡輿徒將畧江淮平荆揚之亂天賜三年四月庚申幸豺山宮占授著作郎王宜弟造兵法孤虛



立成圖三百六十

明元永興二年五月北伐蠕蠕還幸參合陂七月丁巳立馬射臺於陂西仍講武教戰

三年十一月丁未大閱於東郊

四年閏六月丙辰大閱於東郊

五年正月己巳大閱畿內男子十二以上悉集

庚寅大閱於東郊部署將帥以山陽侯奚斤為前軍衆三萬陽平王熙等十二將各一萬騎帝臨白登躬自較

覽焉

太武始光元年九月大簡輿徒治兵於東郊分諸軍五萬騎將北討蠕蠕

二年十月治兵於西郊

三年七月幸雲中舊宮至和兜山七月築馬射臺於長川帝親登臺觀走馬王公諸國君長馳射中者賜金帛繒絮各有差

四年四月治兵講武將西討赫連昌

七月伐赫連昌築壇於柞嶺戲馬射賜射中者金縵帛  
絮有差

神麴二年四月治兵於南郊

延和元年五月大簡輿徒於南郊將討馮文通

大延元年五月丁丑治兵於西郊

太平真君四年六月癸巳大閱於西郊

九年九月乙酉練兵於西郊將討蠕蠕

十一年八月癸未練兵於西郊

文成興安二年七月築馬射臺於南郊

九月壬子閱武於南郊

大安四年七月壬子詔曰朕每歲以秋月閒日命羣官講武平壤所幸之處必立宮壇糜費之功勞損非一宜仍舊貫何必改作也

和平三年十二月乙卯制戰陣之法十有餘條因大儺耀兵以示威武更為制令步兵陣於南騎士陣於北各擊鐘鼓以為節度其步兵所衣青赤黃黑別為部隊楯

稍矛戟相次周迴轉易以相赴就有飛龍騰蛇之變為  
函箱魚鱗四門之陳凡十餘法蹠起前却莫不應節陣  
畢南北二軍皆鳴鼓角衆盡大譟各令騎將六千人去來  
挑戰步兵更進退以相拒擊南敗北捷以為盛觀自後  
踵以為常

孝文延興四年八月戊申大閱於南郊

五年十月太上皇帝大閱於北郊

太和五年二月幸中山已酉講武於唐水之陽

三月幸肆州癸亥講武於雲水之陽所經考察守宰加以黜陟

九月庚午閱武於南郊

十六年八月癸酉詔曰夫文武之道自古並行威福之施必出相藉故三五至仁尚有征伐之事夏殷明獻未捨兵甲之行然則天下雖平忘戰者殆不教民戰是謂棄之是以周立司馬之官漢署將軍之職皆所以輔文強武威肅四方者矣國家雖崇文以懷九服修武以寧

八荒然於習武之方猶為未盡今則訓文有典教武闕然將於馬射之前先行講武之式可勅有司豫修場壇其列陣之儀五戎之數別俟後勅

十七年六月丁巳講武

十八年八月幸陰山閱武臺臨觀講武

十九年正月南伐壬午講武於汝水之西大賚六軍

二十年九月戊辰閱武於小平津

二十二年八月講武於華林園

宣武景明三年九月辛鄴戊寅閱武於鄴南

後周太祖為西魏柱國大將軍以大統九年十月大閱  
於櫟陽

十年冬十月大閱於白水

十一年十月大閱於白水遂西狩岐陽

明帝武成元年三月癸未陳六軍帝親擐甲胄迎太白  
於東方

武帝保定二年十月壬戌講武於少陵原



天和二年十月丁亥親率六軍講武於城南京邑觀者輿馬彌漫數十里諸藩使咸在焉

六年十月壬寅親率六軍講武於城南

建德元年十一月丙午親率六軍講武於城南

二年十一月辛巳親率六軍講武城東集諸軍都督以上五十人於道會苑大射帝親臨射宮大備軍容

三年六月丁未集諸軍將教以戰陣之法

十一月行幸同州己巳大閱於城東

十二月癸卯集諸軍講武於臨臯澤

宣帝以宣政元年六月即位十一月己亥講武於道會苑帝親擐甲冑

隋文帝開皇二年十二月辛未講武於後園

煬帝大業五年四月癸亥出臨津關渡黃河至西平陳兵講武

唐高祖武德元年十月詔曰安人靜俗文教為先禁暴懲凶武畧斯重比以喪亂日久黎庶凋殘是用務本勸

農真在豐贍而人靈未盡寇盜尚繁欲暢兵威須加練習今農收已畢殺氣方嚴宜順天時申曜威武可依別勅大集諸軍朕將躬自循撫親臨較閱

五年十一月丙申幸宜州簡閱將士

八年十一月幸宜州庚子講武於同官縣

九年三月幸昆明池辛卯觀習水戰

太宗以武德九年八月即位九月丁未引諸衛驍兵統將等習射於顯德殿庭謂將軍已下曰自古突厥與中

國更有盛衰若軒轅善用兵即能北逐獯鬻周宣驅駕  
方召亦能制勝太原下至漢晉之君泊於隋代不使兵  
士素習干戈突厥來侵莫能抗禦致遣中國生民塗炭  
於寇手我今不使汝等穿池築苑造諸經費農民恣令  
逸樂兵士唯習弓馬若無賊來我則為汝博士教汝弓  
射庶使汝等武藝優長若有賊來我即為汝將帥領汝  
鬪戰亦望使汝前無橫敵於是每日引數百人於殿前  
教射帝親自臨試每坐或至午時射中者隨賞弓刀布

帛絲綿特加其上考

貞觀八年十二月乙卯太宗從高祖閱武於城北

高宗顯慶五年三月己酉講武於并州城西帝御龍飛閣引羣臣臨觀之左衛大將軍張延師為左軍左右及驍武六衛左羽林騎士屬焉左武侯大將軍梁建方為右軍領武侯六衛右羽林騎士屬焉一鼓而誓衆再鼓而整列三鼓而交前左為曲直圓銳之陣右為方銳直圓之陣三挑而五變步退而騎進五合而各復其位許

敬宗奏曰延師整而堅建方敢而銳皆良將也李勣曰  
甲冑精新將士齊力觀之者猶震恐况當其事乎帝曰  
講閱者安不忘危之道也梁朝衣冠甚盛人物亦多侯  
景以數千渡江一朝瓦解武不可驕兵不可棄此之謂  
也

麟德二年四月丙寅講武於邛山之陽帝御城北門樓  
以觀之

玄宗先天二年十月癸亥親講武於驪山之下徵兵二

十萬旌旗連亘五十餘里戈鋌金甲照耀天地列大陣於長川坐作進退以金鼓之聲節之三軍出入號令如一帝親探戎服持沉香大鎗立於陣前威振宇宙長安士庶奔走縱觀填塞道路兵部尚書郭元振以虧失軍容坐於纛下將斬之宰相劉幽求張說跪於馬前諫曰元振翊戴上皇有大功於國雖犯軍令不可加刑伏願寬宥以從人望帝乃捨之配流新州給事中知禮儀事唐紹以草軍儀有失坐於纛下斬之禮畢乃下制曰傳

不云乎兵之設久矣所以威不軌而昭文德聖人以興  
亂人以廢皆兵之繇也故文事必有武備曜德在於觀  
兵所以外清蠻貊內輯華夏其經濟之致歟自有隋失  
道三靈改卜我唐受命百姓與能四罪而天下服一戎  
而天下定航海梯山罔不率俾休牛歸馬永不復用德  
貸羣物刑清百年然而制軍為旅先王分職在祀與戎  
前史垂訓則未學也孰可棄之往以韋氏構逆兇魁作  
禍則我之宗祀危如綴旒故斬長蛇截封豨戮梟獍掃



撓槍使武之不修則兆人何又朕以薄德皆奉聖謨濟  
邦家之多難畏君父之嚴旨自撫茲億兆若臨淵谷雖  
重譯雲歸和親日至遂五兵之不教慮七德之未康今  
蓋玄冬戒時農事爰隙驪山之下鴻門在望橫層阜以  
南屬耿長川而北流嚴霜初隕疾風始至以時而命羣  
師得地以講武功料其勝負詳其進退以振國威用蒐  
軍實故披堅執銳干戈有容練卒陳師金鼓有節上應  
於天也下順於人也三光之靈可接五行之德斯用將

孫吳不遠頗牧同時非熊所期怒蛙知勸布三令調九  
章且閱宣場之儀若觀莘墟之禮情兼慰賞義弘寵錫  
惟此畿甸比經水旱總集士馬頗有煩勞中念元元更  
資勤恤其講武使各賜物一百段將軍各八十段中郎  
將各六十段郎將及左右軍長史各四十段折衝果毅  
各三十段押官六品以下各二十段新豐百姓宜免來  
年地稅置頓使賜物一百段緣頓踏踐麥苗給米酬直  
時帝既怒唐紹左右猶望寬之會有金吾衛將軍李選  
遽請宣勅遂命斬之時人皆痛惜紹而深咎於選等尋

有制罷選官以  
是遂廢終身

肅宗至德二年八月帝在鳳翔癸巳六軍大閱帝御府  
城樓觀軍陣之容

三年正月庚寅於會元殿陳兵大閱帝御棲鸞閣觀之  
代宗寶應元年九月壬寅大閱兵馬於鳴鳳門街

後唐明宗天成二年十月癸未御興教門觀兵自卯至  
午隊伍方絕

晉高祖天福二年十月勅習戰講武歷代通規選士練

兵由來舊制宜以每年農隙時講武仍准令式處分

六年十二月帝習射於後苑諸軍都督指揮使已上悉預焉

少帝開運二年二月帝次滑州丙子大閱諸軍於咸城帝親臨之

### 修武備

周官大司馬之職制軍詰禁以糾邦國仲尼曰有文事者必有武備蓋五材並用孰能去兵天下雖寧不可忘

戰自大道之隱爭心孔熾必賴兵力以寧禍亂期以庇民而靖國保世而永命者也漢氏而下莫不內嚴師兵之營衛外固溝池之垣翰簡閱以供時使屯戍以防外虞益繕戎器增治戰具申之命令優其募格誕揚武烈以貞師律稽古前訓以成善志固足以壯中權而威不軌震天聲而讐殊俗者矣傳所謂備豫不虞古之善教者也其可忽諸

漢高祖二年令諸侯子在關中者皆集櫟陽為衛天下

既定又踵秦置材官於郡國京師有南北軍之屯

六年十月令天下縣邑城

縣之與邑皆令築城

武帝建元三年初置期門羽林

平帝元始中更名虎賁郎

太初元年初置建章營騎後更名羽林騎以天有羽林之星故取名焉又取從軍死事之子孫養羽林官教以五兵號曰羽林孤兒

二年五月藉吏民馬補車騎馬平百粵內增七校

中壘

步兵越騎長水胡騎射聲虎賁凡八校尉胡騎不當置故此言七也外有樓船歲時講肄

修武備云

後漢光武中興海內人民可得而數裁十二三蕭條靡  
有孑遺鄣塞破壞亭燧絕滅建武二十一年始遣中郎  
將馬援謁者分築烽候保壁稍興立郡縣十餘萬戶或  
空置太守令長招還流民帝笑曰今邊無人而設長吏  
治之難如春秋素王矣乃建立三營屯田殖穀弛刑謫  
徒以充實之也

安帝建光元年初置漁陽營兵

伏侯古今注曰  
置營兵千人也

靈帝中平元年張角反詔公卿出馬弩

五年初置西園八校尉

小黃門蹇碩為上軍校尉虎賁中郎將袁紹為中軍校尉屯騎

校尉鮑鴻為下軍校尉議郎曹操為典軍校尉趙融為助軍左校尉馬芳為助軍右校尉諫議大夫夏牟為左

校尉淳于瓊為右校尉凡人謂之西園軍皆統於碩八

魏太祖初為曹公以漢建安十三年正月還鄴作玄武

池以肄舟師

十四年曹公至譙作舟治水軍

文帝黃初中詔曰昔軒轅建四面之號周武稱予有亂



臣十人斯蓋先聖所以體國君民亮成天工多賢為貴也今內有公卿以鎮京師外設牧伯以監四方至於元戎出征則軍中宜有柱石之賢帥輜重所在又宜有鎮守之重臣然後車駕可以周行天下無內外之慮吾今當征賊欲守之積年其以尚書令潁鄉侯陳羣為鎮軍大將軍尚書僕射西鄉侯司馬懿為撫軍大將軍若吾臨江授諸將方略則撫軍當留許昌督後諸軍錄後臺文書事鎮軍隨車駕當董督衆軍錄行尚書事皆假節

鼓吹給中軍兵騎六百人吾欲去江數里築宮室往來  
其中見賊可擊之形便出奇兵擊之若或未可則當舒  
六軍以遊獵饗賜軍士

明帝景初元年詔青兗幽冀四州大作海船

晉惠帝元康五年十二月丙戌新作武庫大調兵器

後魏道武天興元年二月更選屯衛

五年正月帝聞姚興寇邊庚寅大簡輿徒詔并州諸軍  
積穀於平陽之乾壁

天賜元年五月置山東諸治發州郡徒謫造兵甲

明元永興五年春正月己巳大閱畿內男子十二以上  
悉集

大武神麌三年帝聞宋將寇邊乃詔冀定相三州造三  
千艘簡幽州已南戍兵集於河以備之

延和元年五月車駕將討馮文通七月庚申遣安東將  
軍奚斤發幽州民及密雲丁零萬餘人運攻具出南道  
太平真君六年八月詔發天下兵三取一各當戒嚴以

須後命

九年九月乙酉練兵於郊

孝文承明元年六月甲子詔中外戒嚴分京師見兵為三等第一軍出遣第二兵二等兵亦如之

太和元年十月宋葭蘆戍主楊文度遣弟鼠據仇池詔皮喜討平之又詔喜等曰卿受命專征命薄伐邊寇軍威所及即皆平蕩仇池國之要蕃防守尤須完實從前以來駱谷置鎮是以奸賊息闕關之心邊城無危敗之

禍近繇徙就建安致有往年之役卿等表求築城豈不  
更勞兵將孰若因今兵勢即令就之一勞永逸事不再  
舉也今更給軍糧一月速於駱谷築城使四月盡必成  
就訖若不時營築及築之不成成而不固以軍法從事  
十九年八月乙巳詔選天下武勇之士五萬人為羽林  
虎賁以充宿衛

十月詔徐兗光南青荆雒六州嚴募戍備應須赴集  
二十年十月戊戌以代遷之士皆為羽林虎賁

宣武景明元年十月詔壽春置兵四萬人

四年六月發冀定瀛湘并濟六州二萬人馬千匹增配壽春

永平二年二月詔曰比軍役頻興仗多毀敗在庫戎器見有無幾安不忘危古人所戒五兵之器事須充積經造既殷非衆莫舉今可量造四萬人雜仗

延昌二年五月壽春大水遣平東將軍奚康生等步騎數千赴之

三年十二月出師伐蜀詔中護軍元遙為征南將軍東  
道都督鎮遏梁楚

孝莊建義元年六月詔直寢紀業持節募新免收戶有  
投名効力者授九品官

永安三年爾朱世隆等攻京邑詔諸舊代人赴華林園  
帝將親簡敘以撫軍金紫光祿大夫高乾邕侍中為河  
北大使招集驍勇是年五月詔募士征葛榮

前廢帝普泰元年三月己卯詔右衛將軍賀拔勝并尚

書一人募伎作及雜戶從征者正入出身皆授實官有私馬者優一大階

後周武帝天和元年七月築武功郿斜谷武都留谷津坑諸城以置軍人

建德三年十二月詔荆襄安延夏五州總管內有能率募衆軍者授官各有差

四年初置營軍器監

隋文帝潛有吞陳之志轉朔州總管吐萬緒為徐州總



管令修戰具

唐高祖武德二年七月壬申詔曰天生五材司牧資其  
器用武有七德撥亂所以定功故黃帝垂衣尚有阪泉  
之戰放勳光宅猶稱丹浦之師禁暴安人率繇茲道創  
業垂統莫此為先是以周置六軍每習蒐狩漢增八校  
畢選驍雄故能化行九有威震百蠻姦宄不萌度劉息  
志自季葉凌替軍政湮亡卒列不修旌旗雜伍符籍之  
內空有調發之名逗撓之間竟無討襲之用遂使戎狄

放命盜賊交侵戰爭多虞黔黎殄喪朕受天明命撫育  
萬方爰自義師克成帝業至如超乘之士莫匪百金穀  
騎之才豈唯七萃今雖關塞寧謐荒裔肅清伊雒猶蕪  
江湖尚梗役車未息戎馬載馳武備之方尤宜精練所  
以各因部校序其統屬改授鉦鼓創造徽章取象天官  
定其名號庶使前茅後勁類別區分玉帳絳宮刑德允  
備蹈茲湯火譬彼椒蘭大定戎衣止戈斯在於是置十  
二軍分關內諸府以隸焉萬年道為叅旗軍長安道為

鼓旗軍富平道為玄戈軍醴泉道為井鉞軍同州道為羽林軍華州道為騎官軍寧州道為折威軍岐州道為平道軍幽州道為招搖軍麟州道為苑游軍涇州道為天紀軍宜州道為天節軍時帝以天下未定實資武力將舉關中之衆以臨四方故興此制也每軍一人副一人取威名素重者為之督以耕戰之務自是士馬精強無敵於天下矣

高宗儀鳳三年正月遣左金吾衛將軍曹懷舜金吾將

軍李知十分往河南北道以募猛士

玄宗先天元年正月睿宗詔曰往者皇運伊始戎政肇修兩置軍旅初分府衛計戶充兵纔足用事遂使二十一人募六十一出軍既憚劬勞咸規避匿不有整革將何置理其天下衛士取年二十五以上者充十五年即放出頻經征鎮者十年放出自今已後羽林飛騎並於衛中簡補又勅河北諸州加團練兵令州刺史押當開元二年八月辛巳上以河隴之故命有司大募壯勇

士從軍既募引見置酒於朝堂享之詔曰朕光宅四海  
撫御百蠻屬疆場未寧軍國多費每欲指揮方略親率  
軍師故召募爾等擬從朕行知爾等材力冠羣藝能拔  
萃但以不教人戰豈知金鼓之聲授以兵律方辯干戈  
之勢所以且遣薛訥等於隴右防禦使令教習爾等既  
練韜鈴須明隊伍使投石拔劍以勵威鋒裹糧坐甲待  
清逋寇若能因機立效遇敵邀勲酌以官榮必超格例  
然後陪朕輿駕從戎塞垣俾爾先驅敬聽後命令宴勞

爾等并賜錢三千貫可節級領取即宜好去十月薛訥  
克吐蕃帝遂停親征詔曰比來緣邊鎮軍每年更代兵  
不識將將不識兵豈有緣路疲人蓋是以卒與敵其以  
西北軍鎮宜加兵數先以側近兵人充並精加簡擇其  
有勞考等色所司具以條例奏聞戰兵別簡為隊伍專  
令教練不得輒有使役仍令兵部侍郎裴璠太常少卿  
姜晦往軍州計會便簡支配有見集後軍兵宜令兵部  
侍郎韋抗紫微舍人王珽即簡擇以聞

八年八月詔曰國家偃武教修文德百年於茲矣自運屬清平人忘爭戰俎豆之事嘗聞之矣軍戎之禮我所未暇且五材並用誰能去兵四方雖安不可忘戰故周禮以軍禁糾邦國以蒐狩習戎旅不教人戰是謂棄之宜差使於兩京及諸州且揀取十萬人務求灼然驍勇不須限以蕃漢皆放蕃役差科唯令圍伍教練辨其旗物簡其車徒習攻取進退之方陳威儀貴賤之等俾夫少長有禮疾徐有節將以伐叛懷服將以保大定功叶

於師員以弘武備應須集期及有蠲免所司明為條制  
別作優異法奏聞仍勅幽州刺史邵寵於幽易兩州選  
二萬灼然驍勇者充幽州經略軍健兒不得雜使租庸  
資課並放免

十一年四月勅曰王者之師有征無戰將以懷柔服叛  
非欲黷武窮兵犯令凌政則杜之賊賢害人則伐之維  
其封疆辨其旗物此皆夏官之政也咨爾兵部尚書同  
中書門下三品朔方軍節度大使上柱國中山郡開國



公王峻寅亮天地弼予一人頻總元戎克清河朔師徒  
効力武威遠振遺曠懷仁以思順殊類望聲而歎服勲  
載王室朕甚嘉焉蓋六月出車周美仲甫古訓是式俾  
修我戎宜以來月巡朔方兼往河西隴右河東河北等  
諸軍檢校兵馬點閱器械各與所管節度處置務令得  
所備預之道其在茲乎

十一月詔曰同華兩州精兵所出地資輦轂不合外支  
自今已後更不得取同華人充兵防又勅宜於京兆蒲

同岐華等州府兵內及白丁中簡一十二萬人名為長  
從宿衛准五尺八例一年兩蕃州縣不得更議雜驅使  
仍令尚書左丞蕭嵩與本州官長同揀擇以聞

二十五年五月癸未詔曰自天下一統方隅底平交趾  
西界於庸岷流沙東泊於遼碣烽亭既廣徭戍轉增朕  
永念征夫無忘旰食是用懷柔憬俗賓禮戎臣降子女  
以適其氈裘捐繒玉以申其惠好二十五年於茲矣而  
情周萬寓信結羣蠻羗狄為父子之邦甌貉成冠帶之

國海內無事邊方底寧加以志道而一理得清心而庶務簡和氣來應穰歲以臻羣生樂業而自怡有司措刑而不用今欲小康戎旅大致昇平減停征徭與人休息諸方將相三事公卿宜協朕心勉成良筭宜令中書門下與諸道節度使各量軍鎮間劇審利害計兵防健兒等作定額委節度使放諸色征行人內及客戶中召募取丁壯情願充健兒長任邊軍者每歲加於常例給田地屋宅務加優恤使得存濟每年逐季本使具數報中

書門下至年終一時錄奏長駕遠馭事藉經久無害始  
慮之謀以規苟且之利

天寶十四年正月詔河南置白亭管軍武士健兒五千  
人馬一千匹

代宗大曆二年正月詔潼關置鎮兵三千人四年正月  
遣內侍魚朝恩使於鳳翔之麟遊縣置

七年正月丙辰詔諸道軍數每年秋末冬首一申春夏  
不須申其官健逃亡非承正制勅不得輒召募

德宗貞元三年七月庚辰遣決勝軍使唐良臣以其衆  
六百人自咸陽戍潘原堡神策副將蘇太平率其衆五  
百人戍隴州

八月以宣武行營兵馬使檢校禮部尚書劉昌為本軍  
京西行營節度使初昌衆憚戍靈臺剽三原後各欲散  
歸昌招撫之乃定因加昌以董之改戍麟遊

憲宗元和四年四月中書敘錄諸道將士總八十八萬  
五千人舉大數其邊遠未至者亦有焉

八年十月普潤鎮兵四千人割屬涇原節度使

九年三月乙亥賜振武軍弓甲三百馱

七月甲戌命淮南浙西浙東江西荆南造甲以進仍付之樣

八月乙亥朔丙子以戎械賜宥州

十年五月詔修宥州城

十二月以馬三百匹及軍器給徐州軍又以馬三百匹

給汝州行營

十一年九月丁卯桂州防禦使秦准詔以兵五百戍邕州丙戌以樓煩監馬一百五十匹給昭義軍

十二月癸卯以振武征馬二百匹給義武軍是月方討吳元濟丙辰以襄州兵三千會於唐州

十二年正月辛酉河東節度使張弘靖奏准詔置子弟兵三千

三月義武軍節度使陳楚新置子弟義軍一萬請衣及賜可之

敬宗寶曆二年九月出內庫錢一萬貫令內園召募力士

文宗太和二年七月內出弓箭及刀三千四百隻口令度支差人送銀州防禦營田

五年五月內出陌刀一百五十口馬甲一百領器械一百萬斫刺刀一百口賜鹽州

九年十一月汝州奏頃年河北用兵東都慮有寇盜以當州將士二百人權隸東都留守府今請却屬本州可



之

宣宗大中五年五月勅如聞諸道軍將及官健等近日所在將帥多務因循當召募之時已不選擇及收補之後曾莫教招遂使名在戎行少能知其弓矢職居列校罕見識於韜鈴緩急忽有徵差便取見在應數惟憂就役豈暇圖功虛費資糧莫尅讐敵為弊頗久須有舉明自今已後委諸道觀察節度都防禦團練經略等使每道慎擇會兵法及能弓馬解檣弩及筒射等軍將兩人

充教練使每年至合教習時分指各以本藝閱試其間  
或有伎藝超異者量加優賞仍作等第節級與進改職  
名每至年終都具所教習馬步及各執所藝人數申兵  
部及中書門下仍委兵部檢勘都開件聞奏所冀各盡  
伎能自成勁銳其支郡有兵處亦委本道點檢訓練准  
詔處分

僖宗光啟元年三月詔曰政在有經動惟可久事能師  
古安則易持今者初復舊京須申定制大漢之術兼王

霸先儒之權有弛張重舉綱條且務輯睦未遑改作尤  
貴適時夫萬乘抗威四方從令雖資強幹是切安人迎  
駕諸軍都士等扈從經年鄉闈積念永言忠力合假恩  
優節級議功爵秩無愆其情願住京邑者便充填兩軍  
欲歸本道者即仰所司各與公牒到本道後遞加糧賜  
別立名額給復終身如諸都中人數稍多優賞未徧即  
令所司計其積欠指揮某郡某縣或各逐將校任去處  
上供財賦今自差人請領神策軍自經亂離久未訓整

孤兒漸散壯騎多亡羽林之垂象空存天陣而疾雷不震雖言無戰豈忘有虞宜委中書門下與本軍商量案舊籍裁減元數惟務撫實仍令三司資助各修營壘貴使繕完又金吾諸衛等城禁日嚴檄巡務切須令集事不可闕人亦宜條錄修補

四月以從駕五十四都分為十軍

昭宗天復三年五月宰臣崔裔奏募置左右軍士共六千六百人從之

後唐末帝清泰二年正月詔諸州府本處牢城防禦兵士都將內人數不足團併或闕稍多量許招添其就糧禁軍內本指揮將校選偉壯長於武藝者據人數差節級部送京師

三年七月置水軍五都以董思鐸馬暉何溫安韜史希儼為指揮使尹居璠為都指揮起鄴城先是范延光進軍攻城以濠水澗溺兵士故立此軍

八月詔應州起兵戍茹越口詔忻州堙石嶺關左右道

路

晉高祖天福三年五月昭義奏舊有銅鞮等五縣收拾到甲仗兵共六千七十副已勒作院添修旋送軍前次始帝建義自晉入雒趙德鈞兵敗奔至上黨故有此遺棄戈甲至是再令繕補齎往鄴下

少帝以天福七年即位九年勅天下鳩集鄉兵徧民七戶共資一卒兵仗器具均以出之

開運元年八月將作使周仁美獻三接雲梯懸空橋梁

高三百餘尺遣使送青州行府

周太祖廣順元年四月河中言送器械至隰州付汾州  
刺史王繼勳太祖收河中得繼勳聶遇皆西北山賊之  
魁時劉崇侵撓乃用聶遇為石州刺史繼勳為汾州刺  
史各就險阻設虎落為行州招收賊寇禦邊患焉

五月戊子河陽李暉言奉詔置水軍五百詔諸州於州  
兵內選勇壯并家屬赴京師

十月以寇侵軼平陽遣中使分押虎捷兵士赴河陽陝

州守禦

三年六月遣中使修懷州城池

世宗顯德元年十月謂侍臣曰侍衛兵士累朝已來老少相半強懦不分蓋徇人情不能選練今春於高平與劉崇及蕃軍相遇臨敵有指揮不前者苟非朕親當堅陳幾至喪敗况百戶農夫未能贍得一甲士且兵在精不在衆今已令一一點選精銳者昇在上軍怯弱者任從安便庶期可用又不虛費也侍臣咸曰若非陛下天



縱睿謀無以有此英斷先是自用兵已來勲武得志至於偏裨之間鮮舉雄勇率以親舊互用而有懦怯不能自奮者其行伍可知矣上案兵於高平覩其退縮慨然有懲革之意

四年二月帝再征淮南令右驍衛大將軍王環率舟師數千以從焉先是帝用師於壽春城下覩吳人銳於水戰時我舟師未備無以制之帝憤激及還京遂於京城西汴河之浹造戰船數百艘及成又命於降卒中選水

工數百與我師同習水戰數月之後縱橫出沒殆勝於  
吳師矣至是命環董之俾自蔡河南入於潁以沂淮上  
馬

三月甲午詔發近縣丁夫數千人鎮淮軍有三城夾淮  
相對仍令徙下蔡浮橋維於其間


五年三月己酉命右神武統軍宋延渥帥舟師三千沂  
江而上以江北初定巡警故也

五月壬午賜淮南行營招收馬步軍軍號馬軍曰雄健

欽定四庫全書

卷一百二十四

步軍曰武健



冊府元龜卷一百二十四

欽定四庫全書

子部  
冊府元龜卷一百二十五至  
七

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣王 瓚

謄錄監生臣汪兆鯤

欽定四庫全書

冊府元龜卷一百二十五

宋 王欽若等 撰

帝王部

料敵

夫王者之兵先勝而後戰蓋夫慮敵而動見可而進斯謂出奇無窮伐謀為上也眇觀載籍三代而下撥亂經綸之后仗義征伐之君何嘗不制勝於廟堂之中決幾於萌朕之表沉謀秘略先天奪人臨事對敵望表知

裏用能救元元之命定天下之業夷兇靖難令聞長世  
自非英識內蘊雄威兼厲洞察情偽練達戎昭智慮造  
乎精微規摹極於宏遠又曷能臻此哉

漢高祖初為漢王二年四月西過梁地至虞謂謁者隨  
何曰公能說九江王布使舉兵畔楚項王必留擊之得  
留數月吾取天下必矣隨何往說布果使畔楚八月遣  
酈食其說魏王豹豹不聽乃以韓信為左丞相與曹參  
灌嬰俱擊魏食其還漢王問魏大將誰也對曰栢直王

曰是口尚乳臭不能當韓信騎將誰也曰馮敬曰是秦將馮無擇子也雖賢不能當灌嬰步卒將誰也曰項它曰不能當曹參吾無患矣

武帝元狩四年匈奴入右北平定襄殺略漢千餘人其明年帝與諸將議曰翁侯趙信為單于畫計常以為漢兵不能度幕輕留

言輕易漢君故留而不去也一曰謂漢兵不能輕入而久留也今大

發卒其勢必得所欲帝令大將軍青驃騎將軍去病出

塞大斬首虜

後漢光武建武四年賊帥劉永將董憲時在郟其將賁  
休舉蘭陵城降憲聞之自郟圍休時蓋延及龐萌在楚  
請往救之帝勅曰可直往擣郟則蘭陵必自解延等以  
賁休城危遂先赴之憲逆戰而陽敗延等遂退逐因拔  
圍入城明日憲大出兵合圍延等懼遽出突走因往攻  
郟帝讓之曰間欲先赴郟者以其不意故耳今既奔走  
賊計已立圍豈可解乎延等至郟果不克而董憲遂拔

蘭陵殺賁休



吳漢征公孫述攻拔廣都遣輕騎燒成都市橋武陽以東諸小城皆降帝戒漢曰成都十餘萬衆不可輕也但堅據廣都待其來攻勿與爭鋒若不敢來公轉營迫之須其力疲乃可擊也漢乘利遂自將步騎二萬餘人進逼成都去城十餘里阻江北為營作浮橋使副將武威將軍劉尚將萬餘人屯於江南相去二十餘里帝聞大驚讓漢曰比勅公千條萬端何意公臨事勃亂既輕敵深入又與尚別營事有緩急不復相及賊若出兵綴公

以大衆攻尚尚破公即敗矣幸無它者即引兵還廣都  
詔書未到述果使其將謝豐袁吉將衆十餘萬分為二  
十餘營並出攻漢使別將萬餘人劫劉尚使不得相救  
漢與大戰一日兵敗走入壁豐因圍之

隗囂據天水帝命將征之帝聞得略陽甚悅左右恠帝  
數破大敵今得小城何足以喜然帝以略陽囂所依阻  
心腹已壞則制其支體也

朱浮為幽州牧時彭寵反攻浮涿郡太守張豐亦反浮

以為天子必自將兵討之而但遣鄧隆助浮浮以為帝  
怠於敵不能救之乃上疏詔報曰往年赤眉跋扈長安  
吾策其無穀必東果來歸降今度此反虜勢無久全其  
中必有內相斬者今軍資未充故須後麥耳後豐寵並

自敗

初彭寵攻朱浮於薊帝使游擊將軍鄧隆救薊隆軍路南浮軍雍故遣吏奏狀帝讀激怒謂使吏曰

營相去百里其勢豈可得相及此若還北軍必敗矣寵果盛兵臨河以拒隆又別發輕騎三千襲其後大破隆軍浮遠遂不能救引而去

鄧禹遣馮愔宗歆守枸邑二人爭權相攻愔遂殺歆因

反擊禹禹遣使以聞帝帝問使人情所親愛為誰對曰  
護軍黃防帝度情防不能久和勢必相忤因報禹曰縛  
馮愔者必黃防也乃遣尚書宗廣持節降之後月餘防  
果執愔將其衆歸罪

魏太祖時田豐為袁紹別駕逢紀憚其亮直數讒之於  
紹紹於是有害豐之意後太祖聞豐不從戎喜曰紹必  
敗矣及紹奔遁復曰向使紹用其別駕計尚未可知也  
文帝黃初二年鎮西將軍曹真命衆將及州郡兵討破

叛胡治元多廬水封賞等斬首五萬餘級獲生口十萬  
羊一百一十一萬口牛八萬河西遂平帝初聞胡決水  
灌顯美謂左右諸將曰昔隗囂灌略陽而光武因其疲  
弊進兵滅之今胡決水灌顯美其事正相似破胡事今  
至不久旬日破胡告檄到帝大笑曰吾策之於帷幕之  
內諸將奮擊於萬里之外其相應若合符契前後克獲  
虜未有如此也

三年孫權破劉備於夷陵初帝聞備兵東下與權交戰

樹柵連營七百餘里謂羣臣曰備不曉兵豈有七百里營可以拒敵者乎苞原隰險阻而為軍者為敵所擒此兵忌也孫權上事今至矣後十日破備書到

明帝初即位黃初七年八月孫權攻江夏郡太守文聘堅守朝議欲發兵救之帝曰權習水戰所以敢下船陸攻者幾掩不備也今已與聘相持夫攻守勢倍終不可久也先時遣治書侍御史荀禹慰勞邊方禹到於江夏發所經縣兵及所徙步騎千人乘山舉火權退走之

太和二年正月蜀大將諸葛亮攻邊天水南安安定三郡叛應亮是時朝臣未知計所出帝曰亮阻山為固今者自來既合兵書致人之術且亮貪三郡知進而不知退今因此時破亮必也乃部勒兵馬步騎五萬拒亮遣大將軍曹真都督闕右並進兵右將軍張郃擊亮於街亭大破之亮敗走三郡平

五年三月蜀將諸葛亮攻天水詔司馬宣王拒之初亮出議者以為亮軍無輜重糧必不繼不擊自破無為勞

兵或欲自艾上邦左右生麥以奪軍食帝昏不從前後遣兵增宣王軍又勅使護麥宣王與亮相持賴得此麥以為軍糧

青龍元年閏月保塞鮮卑大人步度根與叛鮮卑大人軻比能私通并州刺史畢軌表輒出軍以外威比能內鎮步度根帝省表曰步度根已為比能所誘有自疑心今軌出軍適使二部驚合為一何所威鎮乎促勅軌已出軍者慎勿越塞過句注也比詔書到軌已進軍屯陰



館遣將軍蘇尚董弼追鮮卑比能遣子將千餘騎迎步  
度根部落與尚弼相遇戰於樓煩二將沒步度根部落  
皆叛出塞與比能合寇邊遣驍騎將軍秦朗將中軍討之  
虜乃走漠北

二年四月諸葛亮出斜谷屯渭南司馬宣王率諸軍拒  
之詔宣王但堅壁拒守以挫其鋒彼進不得志退無與  
戰久停則糧盡虜略無所獲則必走走而追之以逸待  
勞全勝之道也

景初二年正月帝議遣司馬宣王討公孫淵發卒四萬人議臣皆以為四萬兵多役費難供帝曰四千里征伐雖云用奇亦當任力不可稍計役費遂以四萬人行及宣王至遼東霖雨不得晴故羣臣或以為淵未可卒破宜詔宣王還帝曰司馬懿臨危制變擒淵可計日待也卒皆如所策

九月蜀陰平太守廖惇反攻守善羗侯巖葦營雍州刺史郭淮遣廣魏太守王贊南安太守遊奕將兵討惇淮

上書贊奕等分兵夾山東西圍落賊衆破在旦夕帝曰  
兵法惡離促詔淮勅贊奕諸別營非要處者還今據便地  
詔勅未到奕軍為惇所破贊為流矢所中死

晉宣帝初為魏國軍司馬時蜀將關侯圍曹仁於樊于  
禁等七軍皆沒而仁圍甚急是時漢帝都許昌魏武以  
為近敵欲徙河北帝諫曰于禁等為水所沒非戰守之失  
於國家大計未有所損而便遷都既示敵以弱又淮沔  
之人大不安矣孫權劉備外親內疎關侯之得意權所

不願也可喻權使令倚其後則樊圍自解魏武從之權果遣將呂蒙西襲公安拔之關遂為蒙所獲明帝即位以帝為魏驃騎將軍明帝問吳蜀二虜宜討何者為先對曰吳以中國不習水戰故敢散居東關凡攻敵必扼其喉而搃其心夏口東關敵之心喉若為陸軍以向皖城引權東下為水戰軍向夏口乘其虛而擊之此神兵從天而墮破之必矣天子並然之魏太和四年蜀諸葛亮入攻帝為驃騎大將軍破亮于祁山鹵城時軍師杜

襲督軍薛悌皆言明年麥熟亮必來攻隴右無穀宜及冬豫運帝曰亮再出祁山一攻陳倉挫衄而反縱其後出不復攻城當求野戰必在隴東不在西也亮每以糧少為恨歸必積穀以吾料之非三稔不能動矣又諸葛亮使至帝問曰諸葛公起居何如食可幾米對曰三四升次問政事曰二十罰已上皆自省覽帝既而告人曰諸葛孔明其能久乎竟如其言正始三年吳將諸葛恪屯皖邊鄙若之帝為太傅督諸軍南征時帝欲自擊恪

議者多以賊據堅城積穀欲引致官兵今懸軍遠攻其救必至進退不易未見其便帝曰賊之所長者水也今攻城以觀其變若用其所長棄城奔走此為廟勝也若敵固守湖水冬淺船不得行勢必棄水相救繇其所短亦吾利也四年帝軍次於舒恪焚燒積聚棄城而遁五年大將軍曹爽伐蜀帝謂夏侯玄曰春秋責大德重昔武皇帝再入漢中幾至大敗君所知也今興平路勢至險蜀已先據若進不獲戰退見徼絕覆軍必矣將何以任其

責玄懼言於曹爽引軍退費禕進兵據三嶺以截爽  
爭險苦戰僅乃得過所發牛馬運轉者死失略盡羗胡  
怨嘆而關右悉虛耗矣

景初二年遼東太守公孫淵反時帝為太尉都督雍州  
徵帝詣京師天子曰此不足以勞君事欲必克故以相  
煩耳君度其作何計對曰棄城預走上計也據遼水以  
拒大軍次計也坐守襄平此成禽耳天子曰其計將安  
出對曰惟明者能深度彼已預有所棄此非其所及也

今懸軍遠征將謂不能持久必先距遼水而後守此中  
下計也天子曰往還幾何對曰往百日還百日攻百日  
以六十日為休息一年足矣

文帝魏正始中為散騎常侍大將軍曹爽之伐蜀也以  
帝為征蜀將軍副夏侯玄出駱谷次于興勢蜀將王林  
夜襲文王營文王堅卧不動林退帝謂玄曰費禕以據  
險拒守進不得戰攻之不可宜亟旋軍以為後圖爽等  
引旋禕果馳兵趣三嶺爭險乃得過



嘉平四年為安東將軍蜀將姜維攻隴右揚聲欲攻狄道以帝行征西將軍次長安雍州刺史陳泰欲先敵據狄道帝曰姜維攻羗收其盾任聚穀作邸閣訖而復轉行至此正欲了塞外諸羗為後年之資耳若實向狄道安肯宣露令人知今揚聲言出此欲歸也維果燒營而去甘露二年揚州刺史諸葛誕反帝以大將軍討於淮南進軍丘頭吳使文欽唐咨全端等來救誕諸將逆擊不能禦吳將朱異帥輕兵至黎漿異為石苞周泰所擊

敗走吳人殺異帝曰異不得至壽春非其罪也而吳人殺之適以謝壽春而堅誕意使其猶望救耳若其不爾彼當突圍決一旦之命或謂大軍不能久省食減口冀有有他變料賊之情不出此三者今當多方以亂之備其越逸此勝計也因命合圍分遣羸疾就穀淮北廩軍士大豆人三升欽聞之果喜帝愈羸形以示之多縱反間揚言吳救方至誕等益寬恣食俄而城中乏糧石苞王基并請攻之帝曰誕之逆謀非一朝一夕也聚糧完守

外結吳人自謂足據淮南欽既同惡相濟必不便走今  
若急攻之恐內損軍力外寇卒至表裏受敵此危道也  
今三叛相聚於孤城之中天其或者將使同戮吾當以  
長策縻之但堅守三面若賊陸道而來軍糧必少吾以  
遊兵輕騎絕其轉輸可不戰而破外賊外賊破欽等必  
成擒矣

後魏道武皇始元年討慕容寶進運中山引騎圍之帝  
謂諸將曰朕量寶不能出戰必當憑城自守偷延日月

急攻則傷士久守則費糧不如先平鄴信都然後還取  
中山於計為便若移軍遠去寶必散衆求食民間如此  
則人必離阻攻之易尅諸將稱善宣武時任城王澄為  
鎮南大將軍伐梁將攻鍾離詔曰鍾離若食盡三月已  
前固有可尅如至四月淮水泛長舟行無礙宜善量之  
前事捷也此實將軍經略勲有常焉如以水盛難圖亦  
可為萬全之計不宜昧利無成以貽後悔梁冠軍將軍  
張惠紹遊擊將軍殷暹驍騎將軍趙景悅龍驤將軍張

景仁等率衆五千送糧鍾離澄統軍王足劉思祖等邀擊惠紹等大破之獲惠紹殷暹景仁及其屯騎校史文淵等軍主已上二十七人既而遇雨淮水暴長引歸壽春還既狼狽失兵四千餘人頻表解州帝不許有司奏軍還失路奪其開府又降三階

後周太祖初為後魏尚書僕射闕西大行臺時魏帝方圖齊神武太祖乃傳檄方鎮謂諸將曰高歡雖智不足而詐有餘今聲言欲西其意入雒吾欲令寇雒率馬

步萬餘自涇州東引王羆率甲士一萬先據華州歡若西來王羆足得抗拒如其入雒寇雒即襲汾晉吾便速駕直赴京邑使其進有內顧之憂退有被躡之勢一舉大定此為上策衆咸稱善

永熙二年七月太祖率衆發自高平前軍至於弘農而齊神武稍逼京邑魏帝親總六軍屯於河橋令左衛元斌之領軍斛斯椿鎮武牢遣使告太祖太祖謂左右曰高歡數日行八九百里曉兵者所忌正須乘便擊之而

主上以萬乘之重不能渡河決戰方緣津據守且長河萬里  
扞禦為難若一處得度大事去矣即遣大都督趙貴為  
別道行臺自蒲坂濟趣并州遣大都督李賢將精兵一  
千赴雒陽會斌之與斛斯椿爭權不協斌之遂棄椿還  
紹帝云高歡兵至帝遂從雒陽率輕騎入關後帝為大  
將軍大統三年既平弘農因館穀五十餘日時戰士不  
滿萬人聞齊神武將渡乃引軍入關齊神武遂渡河逼  
華州刺史王暉嚴守知不可攻乃涉雒軍於許原西太

祖據渭南徵諸州兵未至乃召諸將謂之曰高歡越山渡河遠來至此天亡之時也吾欲擊之何如諸將咸以衆寡不敵請待歡更西以觀其勢太祖曰歡若得至咸陽人情轉騷擾今及其新至便可擊之即造浮橋於渭令軍人齎三日糧輕騎渡渭輜重自渭南夾渭而西冬十月壬辰至沙苑距齊神武軍六十餘里神武聞太祖至引軍來會癸巳旦候騎告齊神武軍且至太祖召諸將謀之李弼曰彼衆我寡不可平地置陳此東十里有渭



曲可先據以待之遂進軍衆至渭曲背水東西為陣偃戈於葭蘆中間鼓聲而起申時齊神武至望太祖軍少競馳而進不為行列總萃於左軍兵將交太祖鳴鼓士皆奮起于謹等六軍與之合戰李弼等率鐵騎橫擊之截其軍為二遂大破之斬六千餘級臨陳降者二萬餘人齊神武夜遁追至河上復大剋獲

唐太宗初為唐國內史總兵十萬徇東都兩月而旋帝籌之曰賊見吾還必相追躡設三伏以待之俄而隋殺

達學萬餘人自後而至帝發伏以擊之賊師大敗親自追奔至於城下斬四千餘級又高祖武德元年十一月降薛仁果於析墪城虜其衆數萬隴右悉平初帝師次高墪賊堅不動諸將咸稱戰帝曰我士卒新經挫劔銳氣猶少賊以勝自驕必輕進好鬪我且堅壁以折之待其氣衰而後奮擊可一戰而破此萬全之計也因令軍中曰敢言戰者斬相持者久之帝曰可戰矣夜遣將軍龐玉擊賊驍將宗羅睺兩軍酣戰帝以勁兵出賊不意

擊大破之乘勝遂逼析瑘城竇抗等執馬苦諫曰賊主  
猶據堅城雖破羅暎未可即逐請按兵以候其變帝曰  
筭之久矣今日舅不須言破竹之勢不可失也大軍已  
敗餘衆何足為虞凶魁之計盡於此矣遂率軍而進至  
夜半軍臨賊城守陴者皆亂爭自投而下仁泉窮感開  
門請降頓顙於道左高祖聞之大悅遣內史舍人崔確  
齎錦袍馳賚有功者

貞觀二年九月己未突厥寇邊朝臣或言宜修古長城

發人乘塞者帝曰頡利國中盛夏降霜五日並出三月連明赤氣滿野鬼哭於路而不修德暴虐滋甚此所謂不畏天時也遷徙無嘗六畜多死所謂不愛地利也其俗死則焚之今起墳墓背其父祖之命此所謂不敬鬼神也突利即其兄子不能輯睦屢相懷貳此所謂不和民人也有此四過能不亡乎以朕察之殆將不遠當為公等廓定沙場安用勞民遠修亭障也

十五年十一月薛延陀攻李思摩十部帝詔兵部尚書

李勣為朔州道行營總管率兵六萬騎千二百屯朔州  
右衛大將軍李大亮為靈州道行軍總管率兵四萬騎  
五千屯靈武右屯衛大將軍張士貴率兵一萬七千為  
慶州道行軍總管出雲中涼州都督李襲譽為涼州道  
行軍總管以經略之諸將辭行帝誡之曰延陁負其兵  
力踰漠而南途經數千馬已疲瘦夫用兵之道見利速  
進不利速退其掩思摩不能疾擊既入長城又不能速  
退吾先勅思摩燒雜草彼糧食日盡野無所獲頃者偵

人來云其馬畜鬻噉林木枝皮略盡卿等掎角思摩不須前戰俟其將退一時奮擊制勝之舉也又遣右屯衛將軍姜行本率左右飛騎及左右衛引強者數千人受李勣節度十二月甲辰李勣擊延陀破之

十八年九月高昌破焉耆而虜其生口七百初王師之滅高昌也盡以還之焉耆王背德懷二歸誠於吐陸可汗詔安西都護郭孝恪伺機便以討之辛卯帝謂侍臣曰孝恪近奏稱率兵三千以八年十一月詣焉耆二十

日應至必以二十二日破之朕計其行程使人今日應到言未畢驛騎至云郭孝恪已破焉耆

十九年帝征遼次安市城六月丁巳高麗靺鞨之衆十五萬來援安市城帝謂侍臣曰高延壽之來也其策有三若引兵直前連安市城以為壘據高山之險食城中之粟兼縱靺鞨寇吾牛馬攻之則不可卒下欲歸則泥潦為滯此其上策若抽城中之人與之宵遁此其中策若不量其能近城列陣將與吾交鋒者此其下策卿曹

觀之彼必用下策若得縱兵決戰所謂成擒者也賊中有一對盧年老習事謂延壽曰吾聞中國大亂英雄並起秦王聖武所向無敵遂平天下南面為帝北夷請服西戎獻款今者傾國而至唐兵之壯健者悉來其鋒不可當也今為計者莫若頓兵不戰曠日持久分遣驍雄斷其餽運不過旬日軍糧必盡求戰不得欲歸無路此不戰而取勝也延壽不從引軍直進遣馬候之云去安市城四十里帝以為兵家之勢以逸待勞猶慮其低徊



不至詔左衛大將軍阿史那社爾總突厥千騎以誘之  
誠曰鋒交而佯北其必乘爾而來也高麗常令靺鞨居  
前社爾與之纔交而退高麗相謂曰此易與耳競馳進  
軍於安市城東南八里依山麓而陳帝召長孫無忌及  
侍臣將軍等謂曰夷兵既至塵埃亘數十里彼衆我寡  
卿等所知國家猛將謀臣並從朕在此破賊萬全之策  
云何無忌奏稱古來帝王亦有以干戈靜亂而臨天下  
者多委將帥身非經略陛下往時平定海內年踰成童

莫不披堅執銳躬先士伍翦除干紀救蒼生之命鴻名  
遠震海外咸服今所從行將士多是幕府舊人雖遠涉  
夷鄉而喜陪神武橫戈思敵人百其戰古人云將戰必  
觀士卒之情臣適行經諸營衛士等聞高麗已至無不  
抽刀結旆喜見於色往平王世充及竇建德等臣皆從  
征至於奇謀異筭多出睿旨用陛下妙筭無不就擒偶  
違成規必致負敗今陛下親臨遼碣探甲夷鄉滅高麗  
之機在此一舉臣等愚短破陣萬全之策不敢克當特

乞陛下指縱臣等奉以行事帝笑謂曰卿等既推筭於朕朕當為君料量因與無忌李勣等翼數百騎乘高以觀之見其山川可以用奇兵處遣使給延壽曰我以爾強臣篡弑故來問罪即欲交戰非吾本意天子入境芻粟不能於中國轉運破爾數城以取廩食禮苟修則所失必復矣延壽信之竟夕而俟帝夜召文武躬自指麾遣李勣步騎一萬五千於賊西嶺為陳無忌率將軍牛進達等精兵一萬一千以為奇兵自山北於狹谷出以

衝其後帝自率步騎四千挾鼓角偃旌幟趣賊營北高峯之上勅諸將聞鼓角聲而齊進因令所司張受降幕於朝堂之側曰明日午時納降虜於此矣遂率軍而進戊午延壽獨見李勣兵欲與戰帝遙望無忌軍塵起命鼓角並作旌幟齊舉賊衆大懼將分兵承之而其陣已亂時有雷電助我軍威李勣率步卒一萬擊之延壽衆退長孫無忌縱兵乘其後帝又引軍臨之賊因大潰斬首三萬餘級延壽等率其餘寇依山自保迴望我軍擊

其黨類悲號相召其聲甚哀於是詔無忌勣等引兵圍之無忌徹川梁以斷其歸路帝按軍行觀賊營壘謂侍臣曰高麗傾國而來存亡所繫一麾而敗天祐我也因下馬再拜以謝天已未高延壽高惠貞率三萬六千八百人請降帝營於安市城南令李勣攻安市城甚急城中每見帝幡旗必乘城鼓噪帝怒甚李勣曰請破城之日男子盡坑城內聞之人皆死戰詔令江夏王道宗督兵築土山攻其城東南隅高麗亦裨城增雉以相抗詔

遣衛兵分番攻之。日六七合。抱石撞車壞其樓雉。城中  
隨有隳壞。即立木柵。忽聞城中雞彘驚鳴。帝謂李勣曰。  
圍城多日。城中煙火日微。今雞猪甚喧。此其饗士也。卿  
宜嚴兵虜。今夜當出矣。及夜高麗數百人縋城而下。帝  
聞之。從四五騎至城下。召兵急擊。斬首數十級。高麗奔  
退。

後唐莊宗初為晉王。公子梁兵侵劉守文於滄州。攻甚  
急。幽州劉仁恭遣使乞師。使車結轍。武皇恨其翻覆不

時許之帝白曰此吾復振之道也不得以嫌怨介懷且  
九分天下朱氏今有六七趙魏中山在他廡下賊所憚  
者仁恭與我合勢興復本朝是以逞其兵威將令弭服  
絕彼結託使我勢孤然後顯行逼奪賊之成敗我之興  
衰繫此一舉不可失也武皇乃徵兵於燕攻取潞州及  
軍之起也居浹旬杳無音驛物議憂之帝謂賓友曰我  
聞朱氏猜嫌丁會久矣斯人嘗不自安如援兵未至必  
來歸我既而丁會果以城降

天祐十三年

唐哀帝天祐元年後是朱梁建國改號開平其莊宗只稱天祐

與梁將劉

鄴戰於洹水數日兵不交寂若無聲王遣邏騎覘之無  
斥候者摩壘而觀之則營中有班馬之聲而無煙火之  
狀望其壘烏止於上又有旗幟循堞往來覘者還以事  
聞帝曰我聞劉鄴一步百變營外不見賊軍必以詭計  
悞我命覘者入其城中乃以芻為人縛旗上以驢負之  
循堞而行故旗幟嬰城不息問城中羸老者曰軍去已  
二日矣覘者還以聞帝曰劉鄴使兵短於決戰愛乘人



不備謂我大軍一盡於此料晉陽城內全無備兵必欲  
出竒絕我根本虛營設詐懼有追兵計彼行程纔及山  
下既而有人自賊中來言劉鄩兵趣黃澤矣帝遽發竒  
軍追之

十五年大舉赴汴州帝問戰備周德威曰賊軍倍道而  
來未成營壘我今營寨已備固守有餘既深入賊疆須  
決萬全之策機須懸料未可輕行此去汴州不越信宿  
賊之父母妻子盡在其間人之嘗情孰不以家國為念

以我深入之人不以方略制之恐難嘗勝王宜以親軍步卒警其衆按軍以殿臣以其軍擾之使彼不得下營晡晚之後進退無據樵爨不給人心恐懾因以乘之彼不戰而自潰破賊之道也帝曰河上終日排布恨不見賊今見不殺知復何待德威之言一何怯也顧李存審曰勅輜重先發予為爾殿後殺之帝御新軍驟出德威命其子曰吾未知其死所矣及軍出未成列梁軍已結陣而來橫亘數十里亦以陣抗之帝與李存審總河東

天雄之衆居其中德威以幽薊之師當其西鎮定之師當其東梁將賀環王彥章中軍兩軍旗鼓相當短兵接戰帝御銀鎊軍突入賊中斬擊十餘里賀環王彥章單騎走濮陽時我軍輜重在陣西與梁騎相雜衆見朱旗驚走德威軍自相蹈藉不能制止故德威一軍敗績陂中有土山迤邐相屬梁餘衆數萬登山帝帥中軍追至山下梁軍戒嚴不動旗幟甚盛帝呼諸軍曰今日之戰得山者勝賊已據山乘高四望平野觀之罔測衆人乍

見皆有懼心吾與爾等各馳一騎以奪之帝率騎先登銀鎗步卒繼進策馬大呼一時登山賊紛紜而下帝御衆登山賊在土山西結陣數里時已日暮或曰諸軍未齊不如還營詰朝可戰閻寶進曰深入賊廷逢其大敵期於進銳以決雄雌况賊帥奔亡衆心方恐據山而猶委棄結陣更復何為今登高擊下勢如破竹芟除殘孽正在今日銀鎗大將軍建及披甲橫槊而進曰賊軍大將先已奔亡王之騎軍一無所損賊衆晡晚大半思歸

擊此疲敗之軍易如拉朽王且登山縱觀責臣以破賊之效於是李嗣昭領騎軍自山之北略賊陣王建及呼士衆曰今日所失輜重並在山下况彼思歸則一取若拾遺與公等奮稍一呼自然披靡建及大呼入賊陣諸軍繼之賊衆大敗時元城令吳瓊貴卿令胡裝各部役徒萬人於山下曳柴揚塵鼓譟助其勢賊不之測自相騰籍棄甲山積俘斬萬計賊衆殆盡

漢高祖以天福十二年四月

漢高祖於晉少帝開運四年二月即位却稱天福十

二年收復承天軍軍太原東鄙土門路所衝也是歲二月  
帝率兵將下井陘以晉太后過常山議還乃留步卒一  
千戍之備其不虞時以虜還守者怠為虜所偵潛來攻  
我我衆驚潰虜乃焚其井邑一日之中狼煙百餘舉帝  
曰必虜之將退張虛勢也乃遣親將葉仁魯領步騎三  
千趣之會虜黨發擄掠取不意軍至為我所敗斬級獲  
馬各千餘而還一路遂平安

周世宗顯德五年南伐攻楚州率戰士持火炬以焚其

城樓克之帝計其敗卒必將南遁因親領衛士及驍騎  
數百於南城逐之又殺數千人楚州遂平

欽定四庫全書

冊府元龜  
卷一百二十五

二十一

冊府元龜卷一百二十五